



Communicaziun a las medias da la Dretgira superiura

Sentenzia dals 21 da november 2025 (VR1 25 51)

La Dretgira superiura dal chantun Grischun ha refusà in recurs concernent il dretg da votar en connex cun la votaziun dal pievel dals 17 d'avust 2025 davart la renovaziun da la piazza aviatica Samedan.

Las votantas ed ils votants da las indesch vischnancas purtadras engiadinaisas da la piazza aviatica regionala Samedan han gì da decider ils 17 d'avust 2025 davart duas propostas: per l'ina davart la cassaziun dal conclus da la votaziun dal pievel dals 26 da mars 2017 pertutgant investiziuns da renovaziun per l'infrastructura da la piazza aviatica Samedan; per l'autra davart contribuziuns da finanziaziun da las vischnancas purtadras per la renovaziun da la piazza aviatica. Ils dus projects da votaziun èn la finala vegnids approvads cun ina cumpart da vuschs gea da 74,14 pertschent (proposta 1) respectivamain 54,36 pertschent (proposta 2).

Avant la votaziun menziunada – numnadamain ils 5 d'avust 2025 – era vegnida inoltrada tar la Dretgira superiura dal chantun Grischun in recurs concernent il dretg da votar. Il recurrent ha pretendì che la votaziun dal pievel dals 17 d'avust saja da suspender respectivamain d'annullar. El ha motivà quai principalmain cun quai ch'il messadi da votaziun n'informeschia betg a moda confurma als fatgs, equilibrada, cumpleta ed objectiva las votantas ed ils votants. Perquai saja il process da furmaziun da la voluntad nunsfalsifitgada da las votantas ed ils votants violads. La conferenza da la piazza aviatica da l'interpresa d'infrastructura piazza aviatica regionala Samedan (Infra) ha sinaquai proponì, ch'il recurs saja da refutar, perquai che las explicaziuns da votaziun correspundian a las pretensiuns giuridicas. Tut ils elements essenzials areguard ils projects da votaziun concrets vegnian tematisads ed il messadi da votaziun na cuntegnia naginas explicaziuns che mainian en ina direcziun fallada.

En sia sentenza dals 21 da november refusescha la Dretgira superiura il recurs concernent il dretg da votar. Areguard la proposta 1 da las propostas da votaziun (cassaziun dal conclus da la votaziun dal pievel dals 26 da mars 2017) ha il recurrent crititgà en spezial, ch'il messadi da votaziun na cuntegnia naginas explicaziuns tar ils motivs per la disditga dal project da renovaziun 2017. Latiers declera la dretgira, che mancanzas avant ubain durant la votaziun pon be manar tar ina cassaziun da la

votaziun, sche las irregularitads dispaivlas èn considerablas ed adattadas d'influenzar il resultat da la votaziun a moda decisiva. Tenor l'opiniun da la dretgira n'era quai betg il cas: La votaziun dals 17 d'avust 2025 pertutgant la proposta 1 è ida ora fitg cler, considerond la cumpart da vuschs gea da 74,14 pertschent. La pussaivladad che la votaziun fiss sortida auter – perfin cun las explicaziuns pertutgant ils motivs per la disditga dal project da renovaziun 2017 – na vegn sut quellas circumstanzas betg en damonda seriusamain per la Dretgira superiura.

En connex cun la proposta 2 (contribuziuns da finanziaziun da las vischnancas portadras per la renovaziun da la piazza aviatica regiunala Samedan) ha il recurrent critigà tranter auter, ch'i sa dettia be insuffizientamain ord'il messadi da votaziun tge investiziuns respectivamain tge etappas che fetschian part dal project da votaziun. Plinavant sa fundeschian indicaziuns tar ils custs per l'etappa 2a sind ina basa insufficienta e las ristgas financialas na vegnian betg explitgadas en il messadi da votaziun en la dimensiun necessaria. La Dretgira superiura na parta betg questa opiniun. Tut en tut vegn ella tar la conclusiun, ch'il project da votaziun 2 pertutgant manaschi, ristgs financials sco era moviments da retgavs e finanzas na supprima nagins aspects essenzials ch'èn relevants per la furmaziun da la voluntad libra da las votantas ed ils votants. Uschia era circumscriit avunda cler en il messadi da votaziun, che la proposta 2 e cun quai il credit d'impegn da 68,5 milliuns francs sa refereschia sulettamain sin l'etappa 2a cun ils edifizis novs da substituziun e renovaziuns che ston vegnir realisadas enfin l'onn 2031. Correspundentamain è era vegnì explitgà cun la clerezza necessaria en il messadi da votaziun, ch'il project na pertutgia betg la construcziun nova dal heliport (etappa 1) e la sanaziun d'ulteriuras infrastructuras a partir dal 2031 (etappa 2b). Plinavant n'è il principi da l'unitad da la materia betg vegnids violads entras la circumstanza ch'ils edifizis novs da substituziun e las renovaziuns èn vegnidas sutdivididas en ina etappa 2a (enfin 2031) ed ina etappa 2b (sunter 2031), damai che motivs factics suffizients eran avant maun per quai. Perfin sche quai fiss il cas e certas malsegirtads areguard il svilup futur avessan stuì vegnir tematisadas en las explicaziuns da votaziun a moda pli clera, fiss da desister d'ina cassaziun da la votaziun en vista da la differenza da tuttina 392 vuschs (2443 vuschs gea cunter 2051 vuschs na).

La sentenza dals 21 da november n'ha nagina vigur legala. Ella po vegnir contestada tar il Tribunal federal.

Cuira, ils 26 da november 2025

Dretgira superiura dal chantun Grischun

Contact: Stefan Schmid, incumbensà per l'infurmaziun per las dretgiras grischunas,
medien.og@gr.ch

Avis: La communicaziun a las medias intenda l'infurmaziun da la publicitad e las medias. Las formulaziuns utilisadas pon esser differentas da talas en la sentenza. Per la giurisdicziun è sulettamain la sentenza en scrit determinanta. Tala vegn publitgada sin <https://entscheidsuche.gr.ch>